

Nunaqarfinni innuttaasut peqqinnissaqarfiup allalluunniit assingusumik piginnaaneqartut ingerlatassaannik inuunernik peqqinnermillu annaassiniarluni ikiueqqaarnernik pikkorissartinneqartalernissaannik pisariaqartitsinernik periarfissanillu Naalakkersuisut peqquneqarnissaannik Inatsisartut aalajangiffigisassaatur siunnersuut. Misissuineq ukioq 2019 naatinnagu qanoq aningaasalersorneqarnissaanut pisariaqartitsinerit periarfissallu Inatsisartunut saqqummiunneqassaaq.

(Inatsisartunut ilaasortaq Doris J. Jensen, Siumut, saqqummiunneqartoq)

pillugu

Ilaqutariinnermut Peqqissutsimullu Ataatsimiititaliap

siunnersuutip aappassaaneerreqarneranut

ISUMALIUTISSIISSUTAA

Ataatsimiititaliap suliarinninnermini makku ilaasortarai:

Inatsisartunut ilaasortaq Laura Táunâjik, Siumut, siulittaasoq
Inatsisartunut ilaasortaq Stine Egede, Inuit Ataqtigiit, siulittaasup tullia
Inatsisartunut ilaasortaq Karl-Kristian Kruse, Siumut
Inatsisartunut ilaasortaq Nivi Olsen, Demokraatit
Inatsisartunut ilaasortaq Malene Vahl Rasmussen, Demokraatit
Inatsisartunut ilaasortaq Mikivsuk Thomassen, Inuit Ataqtigiit
Inatsisartunut ilaasortaq Aqqa Samuelson, Inuit Ataqtigiit

UPA 2019-imi ulloq 13. maj 2019-imi siullermeerinninnerup kingorna ataatsimiititaliap siunnersuut sukumiisumik misissorpaa.

1. Siunnersuutip imarisaa siunertaalu

Inuunernik annaassiniarluni ikiueqqaarnissamik piumasaqarfiusuni suliamut inuttullu piginnaasalinnik nunatsinni nunaqarfinni innuttaasunik qulakkeerineqataasussamik aalajangiiffigisassamik tunngaviliinissamik Naalakkersuisut aqutissiuiinissaat siunnersuuteqartup kissaatigaa. Siunnersuut aningaasalersuinissamat pisariaqartitanut periarfissanullu misissuineramik imaqassaaq.

2. Siunnersuutip Inatsisartunit siullermeerneqarnera

Siunnersuut Inatsisartunit tapersensorluarneqarpoq. Inunnut pingaarutilimmik inissisimasunut arlalinnut siunnerfilimmik ikiueqqaarnernik ilinniartitsisoqarnissaa pillugu oqallinnermi

siunnersuummik saqqummiussisoqarpoq, taamatuttaaq Arktisk Kommando annertuumik ajutoortoqartillugu apuuteqqaartuusarmata taama suliaqarnermi ilaatinneqarnissaa, aammalu KANUNUPE kattuffillu allat inukitsuni nunaqarfinnilu suliaqartut peqataatinneqarnissaat siunnersuutigineqarpoq.

Immikkoortup siullermeerneqarnerani akissuteqaammi allannguutissatut siunnersuummik imaattumik Naalakkersuisut saqqummiussaqrput:

”Nunaqarfinni tassanngaannartumik pisoqartillugu pitsaanagerusumik ataqatigiissaarinnissamik periarfissat, tassungalugu ilanngullugu ikiueqqaarnermik pikkorissartitsinnissamik pisariaqartitsinerit ingerlatsiveqarfinnut susassaqtartunut oqaloqatigiissutiginnissaat kingusinnerpaamik 2019-ip naanerani Naalakkersuisut aallarnissavaat”.

3. Siunnersuutip aningaasatigut kingunerisassai

Inatsisartut suleriaasianni § 33, imm. 1-imi allassimavoq aalajangiiffigisassatut siunnersuutip piviusunngortinneqarnissaanut aningaasatigut allaffissornikkullu kingunerisassai siunnersuummut tunngavilersuutitut allanneqassasut.

Siunnersuutip piviusunngortinneqarnissaanut aningaasatigut kingunerisassat matumani allanneqarsimaneri siunnersuummut naapertuunna ataatsimiititaliamit maluginiarneqarpoq, taamaalilluni siunnersuuteqartup paasinninna naapertorlugu ukiumoortumik nakorsamik tikeraartoqartaraluartoq ikiueqqaarnermik pikkorissaanermik ingerlatsisoqarsinnaalissalluni. Taamaattumik 200.000 kr.-t iluini ingerlanneqarsinnaasoq siunnersuuteqartup missiliorpaa.

Siunnersuummik pineqartumik misissuinnissamat imaluunniit ikiueqqaarnermut pikkorissaanermik ilinniartitsinerup ingerlanneqarnissaanut qanoq akeqarsinnaanera Naalakkersuisut akissuteqaataanni eqqaaneqanngilaq.

4. Ataatsimiititaliap siunnersuummik suliarinninna

Siullermeerineq tunngavigalugu ataatsimiititaliap siunnersuut misissorpaa Naalakkersuisullu akissuteqaataat oqaluuseralugu.

Tamatumunnga atatillugu innuttaasunik ikiueqqaarnermut pikkorissaanissamat peqqinnissaqarfik akisussaanngitsoq Naalakkersuisut isumaqartut ataatsimiititaliamit maluginiarneqarpoq.

Taama oqaaseqarneq pillugu ataatsimiititaliamit sakkortuuliutiginngikkaluarlugu, sukkasuumik ikiuineq marloriaammik ikiuinerusoq, eqqortumillu ikiuineq inuunermik annaassisinnaasoq ataatsimiititaliaq isumaqarpoq. Inuunermik annaassiniarluni ikiuineq qitiulluinnarmat ikiueqqaarnermillu ilinniarsimasoqartillugu inuunermik annaassisoqarsinnaammat ataatsimiititaliamit isumaqatigineqarpoq, taamaalillunilu SAR-mut,

MED-Evacs-imut assigisaannullu aningaasartuutitut inuiaqatigiit sipaaruteqarsinnaasut isumaqarfigalugu.

Inuup inuuneranik annaassiniarsinnaaneq pineqarmat kiap akisussaaffigineraa apeqqutaasariaqanngitsoq Ilaqutariinnermut Peqqissutsimullu Ataatsimiititaliaq inernilivoq.

Ilinniartitsinermik ingerlatsisinnaasunik aammalu nunaqarfinni inoqarfinnilu mikisuni peqareersoq ilanngullugu ataatsimiititaliamit maluginiarneqarpoq. Taamaattumik ikiueqqaarsinnaasut tamakku peqataatinneqarnerisigut qanoq inuunermik annaassisinnaanersugut ikiuisinnaanersugullu aammalu tapersersoqatigiissinnaanersugut matumani ilanngullugu, inuunermik annaassiniarluni ikiueqqaarneq qanoq pitsaanerusementik ataqatigiissaarinermi annertunerusementik akuutinneqarnissaat ataatsimiititaliamit kissaatigineqarpoq.

Naalakkersuisut allannguutissatut siunnersuutaat saqqummiunneqartoq ilusiliinissamut piumasaqaammut naammassinnissimangitsoq aammalu pineqartumi taaguusersueriaatsinut nalinginnaasunut naapertuutinngitsoqartoq naggataatigut ataatsimiititaliamit maluginiarneqarpoq.

Taamaattumik allannguutissatut siunnersuummik imaattumik ataatsimiititaliaq saqqummiussaqaarpoq:

Pisariaqartitsineq aallaavigalugu pitsaanerpaamillu ataqatigiissaakkamik ikiueqqaarnermik pikkorissarnissamik pisariaqartitsinerup qulaajaanissamik imaqartumik nalunaarusiamik tamatuminngalu pisariaqartitsinermut aaqqiissutaasinnaasumik 2020-imi upernaakkut ataatsimiinnermi Naalakkersuisut saqqummiusseqqullugit peqquneqarnissaannik Inatsisartut aalajangiiffigisassaattut siunnersuut. Nalunaarusiaq, saqqummiussinerup nalaani tamanna pereersimangippat, missingersuummik AIS 2021-imut ilanngunneqartussamik ilaqartinneqassaaq.

Naalakkersuisut nalunaarusiamik suliaqarnerminni siullermeerinermi oqaatigineqartut isumaliutissiissummillu suliaqarnermi illuatungeriit taaneqartut susassaqaartullu tusaaniassagaat ataatsimiititaliamit kaammattuutigineqarpoq.

5. Ataatsimiititaliap inassuteqaatai

Tamanna tungavigalugu ataatsimiititaliap allannguutissatut siunnersuutaa qulaani pineqartoq akuerineqassasoq siunnersuutillu allat itigartinneqassasut Ilaqutariinnermut Peqqissutsimullu Ataatsimiititaliap isumaqatigiittup inassutigaa.

Taama oqaaseqarluni isumaliutissiissumilu allassimasunut paasinnilluni ataatsimiititaliap siunnersuut aappasaaniigassanngortippaa.




Stine Egede
Siulittaasup tullia



Laura Táunâjik
Siulittaasoq



Karl-Kristian Kruse



Malene Vahl Rasmussen



Mikivsuk Thomassen



Aqqa Samuelsen